



10. juni 2026

UPA2026/56

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 2/2025-mik Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni naalakkersuisunut Islandimilu naalakkersuisunut kaammattuutigaa,

- **Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut, internettimut nalunaarasuartaatigullu attaveqaatinut, akisussaasut naapissasut Atlantikullu avannarpasinnerusortaani attaveqaqatigiinnermut internettimullu attaveqaasersuutit inuiaqatigiinnut pingaarutillit, minnerunngitsumik imaatigut kabelit qaammataasatigullu attaveqaatit, isumannaassusiat oqallisiginiarlugu,**

- **Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut akisussaasuusut naapinnerminnut atatillugu misissussagaat Atlantikup avannarpasinnerusortaani nunat imaatigut kabelii qaammataasatigullu attaveqaataat eqqarsaatigalugit sillimaniarneq upalungaarsimanermullu pilersaarutit pillugit suleqatigiinnissamut tungavissaqarnerisq.**

(Aallartitat siulittaasuat Pipaluk Lynge, Inuit Ataqatigiit)

Nunat Avannarliit Killiit Siunnersuisoqatigiiffiata kaammattuutaannut 2/2025-imeersumut saqqummiunneqartumut Siumut sinnerlugu qujanaq.

Nunarsuarmi politikkikkut pissutsit sakkortusiartuinnarneranni aammalu digitalikkut attaveqaatit pingaaruteqaleriartuinnarneranni Kalaallit Nunaata attaveqaasersuutit pingaarutillinni illersorneqarsinnaasumik inissisimanissaata qaffasinnerpaajunissaa pingaaruteqarluinnarpoq. Immap naqqatigut kabelit imaluunniit satellitsit aqqutigalugit attaveqaatit inuiaqatigiinni nutaaliaasuni pingaarutillit inissisimapput, innuttaasunut, inuussutissarsiortunut, peqqinnissaqarfimmut, upalungaarsimanermut aammalu pisortat ingerlatsinerannut pingaaruteqarluinnartuullutik.

Siumup pissusissamisoortutut isigaa Kalaallit Nunaata Islandimik Savalimmiunillu suleqatigiinnera nukittorsarneqassasq, pingaartumik attaveqaasersuutit pingaarutillit pillugit isumannaallisaaneq, upalungaarsimaneq aammalu illersornissaq eqqarsaatigalugit. Nunat Avannarliit Killiit siunnersuisoqatigiiffiani nunat ilaasortaasut assingusunik unammilligassaqarmata misilittakkanik paarlaasseqatigiittarnissaq aammalu upalungaarsimanermut tungasuni suleqatigiinnerup nukittorsarnissaa iluaqutaassaqaq.

Peqatigisaanillu erseqqissarneqassaaq Kalaallit Nunaat attaveqaasersuutit pitsanngorsarnissaat aammalu nukittorsarneqarnissaat pillugu massakkut sulianik ingerlataqartoqartoq ilisimavarput. Nunanut allanut ataasiinnaanngitsumik attaveqaateqarnissarput pingaarutilerujussuuvoq, tassami attaveqaasersuutit amerlanerulersillunneqarnissaat (redundans) pisariaqavippoq, taamaattumillu inuiaqatigiinnut pingaarutilerujussuulluni attaveqaatit ataasiakkaaginnaat aallaavigalugit ingerlasoqannginnissaa. Taamatuttaaq Tusass-ikkut attaveqaatit pillugit isumannaallisaaneq upalungaarsimanerlu pillugit piumasqaatit inatsisitigut sukaterneqartarnissaat sulissutigineqartarmat.



Siumumut pingaaruteqarpoq ineriartortitsineq Kalaallit Nunaanni soqutigisat tunngavigalugit ingerlanneqassasoq aammalu attaveqaasersuutit pingaarutillit Kalaallit Nunaanni oqartussaasuniit oqartussaaffigalugit ingerlajuarnissaq. Attaveqaatit amerlanerulersillunneqarnissaat (redundans), nunanut allanut attaveqaatit amerlanerusut aammalu Nunat Avannarliit Killiit akornanni suleqatigiinnerup nukittorsarneqarneranik pilersuinermi isumannaatsuunermik annertusaataallunilu Kalaallit Nunaata siunissami unammilligassanut pitsaanerusumik piareersimanissaanut iluaqutaassaaq.

Siumumiit taamatut oqaaseqarluta siunnersuut taamak isikkoqartillugu aappassaaneerneqarnissaa innersuussutigaarput.

Qujanaq.

Erik Jensen, Siumut